

Халқаро форумда идора фондида сақланаётган Қуръони Каримнинг еттита ноёб нусхаси тақдим этилади



19:23 / 31.10.2022 1656

Жорий йилнинг 1-3 ноябрь кунлари «Халқаро зиёрат туризми ҳафталиги» доирасида Имом Бухорий халқаро илмий-тадқиқот маркази, Ислом тарихи, санъати ва маданиятини тадқиқ этиш маркази ҳамда Ўзбекистон Республикаси Туризм ва маданий мерос вазирлиги ҳамкорлигида Самарқандда “Марказий Осиё – ислом санъати ўчоғи” номли халқаро форум ўтказилмоқда.

Форум доирасида «Ўзбекистон фондларида сақланаётган Қуръони Каримнинг қадимий нусхалари» мавзусида халқаро кўргазма ҳам ташкил этилади. Мазкур кўргазмада Ўзбекистон мусулмонлари идораси

кутубхонасида сақланаётган еттита нодир ва қадимий Қуръони карим нусхалари ҳам тақдим этилади.

Шунингдек, Имом Бухорий халқаро илмий-тадқиқот маркази хабарига кўра, форум доирасида «Мовароуннаҳрда китобат маданияти» мавзусида ислом амалий санъати турлари бўйича фестиваль ва ҳунармандлар савдо ярмаркаси, ҳамда “Қадимий ёзма манбаларни сақлаш ва тадқиқ этиш тизимини такомиллаштириш масалалари” мавзусида халқаро конференция ташкил этилади.

Халқаро форумда 40 дан зиёд давлатдан 300 нафарга яқин иштирокчи қатнашиши кутилмоқда.